

四庫全書

集部

欽定四庫全書

宋詩鈔卷九十一

內閣中書舍人吳之振編

盧溪集鈔

王庭珪字民瞻廬陵人登政和八年第調衡州茶陵丞拂衣去盧溪築草堂因號焉時胡銓論忤秦檜謫嶺南獨庭珪送以詩語且觸檜坐流夜郎檜死得還數召對優禮除國子監主簿主管台州崇道院九十

三卒學邃于易著易解見者歎為必傳會詩獄捕至  
攜書鐫篋中為卒所攫去歎曰天厄吾書門人楊廷  
秀序其詩謂得傳於曹子方出自少陵而主於雄剛  
渾大此第言其崖岸爾若遣思屬辭未離窠坎使真  
氣蒙翳於篇句間亦未免於詩家疵癘也

題宣和御畫

玉鎖宮扉三十六誰識連昌滿宮竹內苑寒梅欲放春  
龍池水暖鴛鴦浴宣和殿後新雨晴雨鵲飛來向東鳴

當時妙手貌不成君王筆下春風生長安老人眼曾見  
萬歲山頭翠華轉恨臣不及宣政初痛哭天涯觀畫圖

舟次白沙

朝發螺浦湄暮宿白沙口初為夜行計有物應掣肘山  
雲四面起風濤半江吼落帆危石磯就枕不敢久林深  
鳴鶴鵲村遠聞雞狗夢覺如月明破篷見牛斗起視天  
色清解纜欲放溜浪頭聒天響掀簸入我牖蒲帆未及  
張篙師復回首渡頭有古祠壁畫雜怪醜舟人相與言

勸我酬神酒出處本細事陰晴亦常有我固不問天豈

問土木偶

張持操攜徐獻之侍郎書見訪兼出示著述中興  
論諸雜文為賦詩一篇以文軸還之他日亦錄  
寄獻之也

君不能徒步上書獻天子又不能移書帝城結王公欲  
將筆力扛九鼎紙上有說能平戎宣和治極久忘戰  
騎馬嘶淮甸是時猶屯百萬師無人北向放一箭大

臣搏手知何為草間公卿兒女啼至今謀國無上策讀  
君斷藁令人悲君家人物照青汗曲江猶識闕亂他  
年論事要回天應向荊州尋好漢

贈別黃超然

我生不識黃太史猶及諸老談遺事藍田生玉海生珠  
謂君眉目無乃似誰作江西宗派詩如今傳法不傳衣句  
中有眼出月闕密付嫡孫人未知宗風後必喧人口雲  
夢更須吞八九闕年拈此一瓣香獅子窟中獅子吼

送吳闕舉主簿往清江受納秋苗

田頭作穀催入場一半白著輸官倉廬江主簿喜懷檄  
放船椎鼓開帆檣蕭灘老農公事畢夾道歡呼羅酒漿  
笑言歸去喚妻子今年租米兩平量

劉晞陽貧甚爨烟不屬書讀而不輟作詩遺之以  
激其志因叙其貧之所以然冀當塗有聞之者  
荷鉏初讀書中原已鼎沸輟耕仰太息衣食尚卒歲喧  
呼傳點丁田廬忽湮替產盡猶索租從何出租稅迺知

天寶後信如石壕吏君門九重深旗戟森兵衛朱轡背  
相望莫有察凋弊賴于天資高追琢自成器時能從諸  
生扣門來問字長篇爛溢目春葩吐奇麗飢雖不堪煮  
要自飽風味迺翁昔好事賓客常滿位小兒聽客語炊  
甑忘箸筭豈慮飯成糜爾來糜亦廢誰能饋升斗與子  
黔突啄

寅陂行

安成西有寅陂溉田萬二千畝廢久官失其籍大姓



專之陂旁之田歲比不登邑丞趙君搜訪耆耄盡得古跡浚溪港起堤閼躬視阡陌灌注先後各有繩約不可亂是歲紹興十三年適大旱而寅陂溉萬二千畝苗獨不稿民頌歌之國家方下勸農之詔法有農田水利實丞職也然緣是而偽自增飾以蒙褒顯者世不為怪由是水利為虛名今寅陂功績崇崛丞不肖自言部使者終不及省察某出城別君東門外逢寅陂之民塞路涕泣言此為叙其事作寅陂行不復

緣飾皆老農語也冀有採之者紹興癸亥十月望日  
書

安成城頭烏夜宿啼烏未起雞登木傾村入城來送君  
馬首摩肩袂相屬但有龐首不識名何物老翁出山谷  
老翁持酒前致詞家住西村大江曲大江兩岸皆腴田  
古有寅陂置官屬自從陂廢田亦荒官中無人開舊瀆  
公沿故道堰橫流陂旁杭稻年年熟今年雖旱翁不憂  
田頭已打新春穀誰云此陂會當復老父曾聞兩黃鵠

嗟哉如君不負丞躬行阡陌勸農耕監司項背只相望  
風謠滿路胡不聽胡不聽寅岐行為扣天閭叫一聲

送宣向卿往衡山兼寄胡康侯侍講

朱陵衡岳仙人所居公是

行緣故交招隱公有  
雪寃錄歷職諸監司

海內甲馬未盡休豪英為時當出謀天生奇才必有用  
何乃相率居岩幽胡公人品今第一汗漫久作朱陵遊  
朱陵窟宅倚蒼翠此公招隱安可留九廟今誰起頽歷  
四方正爾煩誅求我聞昔時元刺史舂陵地分天子憂

少陵作詩頌其事至今人傳元道州公為道州績尤偉  
誰為再作春陵謳孤城疲卒捍狂賊高論力詆庸兒羞  
安得如公數十輩參錯天下為邦侯京洛風塵不難掃  
潢池寇孽不難收願公早請尚方劍先斬佞臣張禹頭

贈齊軒仲素老

并序

齊軒仲素老自安成京師遊螺川凡十餘偶過其居  
齊軒面東山一峯曰秀嶺烟雲草木翠色依然真逸道  
人作詩招之以代東山移文云

秀嶺明東城飛翠橫空斷烟霞互滅沒爽氣浮清旦旁  
連仙人居樓殿出天半金龍蟠繡柱銀榜開琳館齊軒  
面青蔥下瞰綠篠岸我嘗醉其上謳吟雜悲歎一時賢  
士夫車馬共遊款當年二學士

伍醇父  
劉偉明

落筆瀉銀漢曾

賦齊軒詩字字星斗爛事逐雲雨空鬼錄尚可按重來  
兵火餘觸目自悽惋惟有軒前山秀色還舊觀曉猿驚  
未已歸袂何必挽胡為走塵埃廢此奇一段山靈亦可  
畏移文定嘲玩

送陸景莊提幹

驅車越荆吳轍跡走欲半是時親戚多烜赫踐華貫中  
有衣繡人持斧下霄漢利權炙可熱冷語冰未泮徒乘  
朱斑輪呵殿嚇閭閻如讎帶面具應遭鬼笑玩而況新  
失職誰肯聽呼喚坐令公困窮旅突幾不爨蔚然鸞鳳  
姿胡為雜鵝鶴我實憎此曹期君遊汗漫

次韻曾育才翠樾堂雪詩

哦君翠樾堂中雪詞如劒戟相磨切又如牛鐸應黃鍾

水中躍出麤賓鐵因誦東坡憶雪詩城郭山川兩奇絕  
翠樾堂中雪復然敢擬片詞增竄竊長安道上醉騎驢  
忍凍不知蹄屢蹶爭似淮西破賊時蔡州城外沙如月  
將軍一箭射欃槍夜落城頭曉方滅捷書飛奏不動塵  
露布馳來迷玉闕醉翁句律號令嚴凍口何由更開說  
銀杯任逐馬蹄翻斷藁殘編且局鐫

同陳思忠訪洪覺範

尋春反向僧房臥無乃行藏與時左起來刮目覽新詩

花壓欄干夢初破黃葉丹楓屬興深吁然莫測疑楚些  
惠休島可沒已久二百年來無此作世間何處著斯人  
秀句天教出寒餓我氣未衰詞頗弱欲借鼓旗聊一佐  
終朝巖下不逢人苔色應嗔馬蹄沍

酬聶達夫惠所業

聶郎贈我長短句大盤小盤堆玉筍當年持此驚市人  
破帽蹇驢誰借譽厭聞百鳥呼春風自作綵鳳鳴孤桐  
俗聞惡語敗人意胡不謁帝明光宮



次韻張子春賦瑤林春色

余瑤林洞中以醑醪作麴因為酒名

花間酌酒邀明月，月照金樽佳興發。  
鯨吞霧捲百川空，醉挽醪醑落香雪。  
便將壘麴築糟丘，醑醑壓膏麥為蘖。  
釀成忽見張公子，公子家居近丹闕。  
為予乘興誇洛陽，笑指沙頭臥雙楫。  
洛陽視此真草野，敢欲新詩借牙頰。  
瑤林名字出風塵，未遇知音那敢說。  
況能大讀離騷句，痛飲雖多不為饕。  
未識王家碧玉香，髣髴東坡真一訣。  
誅茅本結方外人，豈用禮法相分別。  
預拂瑤林一片石。

與君醉過清明節窮亦不足悲達亦不足說酒闌插劍  
怒肝膽正恐不免論功業

和陳柄臣見贈

北人愁聽江南曲細草新蒲幾回綠當年避敵初渡南  
千官蒼黃飯不足中原亂後又逢春邊頭只道無烟塵  
邇來公卿不生事此事必屬非常人我曹生長江南樂  
豈料翻成風土惡湖海元龍氣尚豪贈我新詩何確錯  
拾遺後出最能文修椽大屋今荒墳遠孫高材淹管庫

猶能落筆生烟雲  
山城相遇初相喜  
共論大梁人物美  
莫學夷門抱闕吏  
謀竊兵符推晉鄙

李仲孫佩軒

我友李仲孫  
飭身一何介  
被服古衣冠  
昂然偉而怪  
開軒蓬戶中  
紉蘭以為佩  
布袍揖公卿  
脫幘臥江海  
方其得意時  
天地不能碍  
荷鉏入深林  
剪薙發幽薈  
清芬動窻壁  
蔥若連光彩  
君看紫綬翁  
腰垂黃金帶  
璜玕錯珞瑤  
印章如斗大  
步趨龍尾鏘  
然中音會  
豈如此香草

擢秀繁霜外秋風落萬木臭味久逾在我思軒中人免  
食三斗艾夢寐欲見之一往清鼻界

送駱仲武

淵明不喜折腰趨寧作拄笏何易于勸農使者鄙丈夫  
少年新進安識渠下馬怒頰虬奮鬚指揮星火飛文符  
詈辭愧語靡不無諸公止欲求薦書推斲肌骨尋膏腴  
公為一笑憐其愚熙朝成法字已孚堅如金石莫可無  
鞭且勿施安用蒲三年竟亦無逃遁吏民遮道相歡呼

生立叢祠傍佛區想當逸氣吞江湖與人恢疏無怨吁  
臨邛小子傲鄉閭方乘朱輪呵道衢公歸西山結茅廬  
丹崖絕壁巉空虛誰能負弩當道隅終日與爾為前驅

觀徐明叔畫湘西磨崖圖

崖有湘西白鶴  
峯紀官軍破賊

衡山高出北斗邊九疑蒼梧相屬聯羣峯環走如却立  
山脚插入瀟湘川朱陵渺邈迷處所白鶴噴薄飛流泉  
坐看徐郎拂絹素盡驅山岳置眼前徐郎豈是真畫手  
酒酣遊戲乃其天巴陵洞庭連浦溆鯨鯢蟠穴為賊淵

詔謂將軍出旗鼓樓船蹴踏驚浪喧櫓槍夜落照湖水  
雕弓十萬猶控弦湘西古寺最奇絕丹崖翠壁開何年  
況公文章善叙事大字怪偉宜鐫鐫中書異時觀落筆  
因煩吮墨圖凌烟孟公韓公毛髮動腰鞬大羽冠進賢  
他年中興事可考公名亦與茲山傳

題惠崇畫秋江鳬雁

老崇學畫如學禪中年悟入理或然長江未落鳬雁下  
舒卷忽若無丹鉛定自維摩三昧裏半幅生絹開萬里

不用并州快剪刀，斷取鐵圍山下水。

往年見趙德之說，惠崇嘗自言裁畫。

中年後有悟入處，豈非慧力中所得圓熟故耶？今觀此短軸，定非少年時筆也。故詩中云爾。

雅歌樓詩送永豐宰鄧晉卿

潢池赤子弄庫兵，犬牙蟠接度漳汀。十年烽火照縣郭，白晝不敢問衙庭。忽見青樓臨大路，樓上高歌揮白羽。樓前解角看投壺，終歲不聞撾戰鼓。主人坐嘯已風流，小婦鳴箏樓上頭。曲罷仍能雅歌舞，送君此舞傳中州。

贈寫真徐濤

并引

世言畫工喜作鬼魅謂荒誕易圖也故傳神寫照為難聞徐濤畫盧溪老子作幅中芒鞋蕭散之狀見者以為甚似作詩求之

徐生畫人不畫鬼點目加毛必佳士邇來下筆更逼真勿論山僧及童子會貌詩人孟浩然便覺灞橋風雪起如今儻欲畫盧溪一菴宜著深巖裏

戴國和得潘衡墨法於言意之外今攜之湖湘必有識之者作詩以送之



老潘膠法秘不傳君獨得之乃其天此法髣髴如參禪  
忽然有省夜不眠又如神仙換骨法應手不自知其然  
湖東大帥天下賢詞源如海筆如椽本是玉堂揮翰手  
正要此物供磨研醉題李白三百首掃盡將軍九萬牋  
老潘歿來知幾年聲名始落瀟湘川君不見呂洞賓竹  
絲簾子烏紗巾長安市上無人識喚作湖西賣墨人

和酬黃子默

牛渚西江夜新聲月下聞定知終夕詠不覺曉光分儻

有罇中酒重論日暮雲山林正憔悴抵掌忽逢君

辰州上元

留滯遠湘浦飄如雲水僧來為萬里客又看一年燈翠  
憶褰珠箔高樓俯玉繩鼇山今夜月應上最高層

入辰州界道中用頤子韻

路入荒溪惡波穿亂石跳騎驢行木杪避水轉山腰倒  
挂猿當道橫過竹渡橋吾生本如寄歲晚尚飄飄

憶馨鴻二孫

余竄夜郎日二孫纔三四歲阿馨已誦得數部書兼  
寄書紙來阿鴻尚幼余甚念之作憶馨鴻詩寄令誦  
之

憶汝何時見愁眉此日舒別來三換歲誦得幾多書字  
稍堪拈出翁今喜有餘阿鴻纔弄筆相對想軒渠

江上

倚杖江風起呼船水面開人從洲背渡帆破浪頭來月  
色共千里天恩偏九垓當年送客處待看客車回

謫辰州

得失真何事文章妙入場  
隱身三十載汗簡幾千張  
名落江湖外氣干牛斗旁  
吾哀任飄泊朝夕渡沅湘

春日山行

緩鞚青絲馬不嘶春山草  
長靜柴扉迸林新笋斑斑出  
隔水幽禽款款飛雨過泉聲  
鳴嶺背日長花氣撲人衣  
雲藏遠岫茶烟起知有僧居  
在翠薇

避亂深山蒙兄寶君寄牡丹  
數枝鮮妍不減平日

始覺茅簷頓有春色感歎之餘因成拙句

鄉井彫殘屋瓦頽東風依舊上池臺別來縱值時方亂  
春到何曾花不開驟覺茅簷堆錦繡未消翠輦走塵埃  
勿云去草草無惡今日遮藏要草萊

再過東岡

物色江寒楓葉凋江邊微雨暮蕭蕭白沙翠竹舊行路  
碧水朱欄新渡橋盡室當時避征戰十年閒事付漁樵  
如今餘屋明人眼一笑端能覆酒瓢

和胡觀光登酒樓

李白天登孫楚樓樓中玩月苦淹留定知公等非凡客  
要是人間第一流玉勒穿花回曲徑銀槽瀉酒注深甌  
遙觀翠幕張燈處少婦鳴箏坐上頭

和居東村作

山中有西  
泉寺故基

避地東村深幾許青山窟裏起炊烟敢嫌茅屋絕低小  
淨掃土牀堪醉眠鳥不住啼天更靜花多晚發地應偏  
遙看翠竹娟娟好猶隔西泉數暖田

題郭秀才釣亭

野闊江寒一雁飛  
碧蘆花老鰕魚肥  
遶欄綠水秋初淨  
滿棹白蘋人未歸  
醉任狂風揭茅屋  
卧聽殘雪打蓑衣  
他年欲訪沙頭路  
會自攜竿扣竹扉

送胡邦衡之新州貶所二首

囊封初上九重闕  
是日清都虎豹間  
百辟動容觀奏牘  
幾人回首愧朝班  
名高北斗星辰上  
身墮南州瘴海間  
不待他年公議出  
漢廷行召賈生還

大厦元非一木支欲將獨力柱傾危癡兒不了公家事  
男子要為天下奇當日姦諛皆膽落平生忠義只心知  
端能飽喫新州飯在處江山足護持

次韻周公子秋日書懷

酒酣下筆不能休寫盡江南萬斛愁長史果為何物漢  
中軍不是置書郵又聞戰馬將休息且任浮鷗自去留  
觸目西風易增感山川信美莫登樓

向文剛讀書齋試雙井茶有懷黃超然

雙井老人  
當以青沙



蠟紙裹細茶寄人不  
過二兩今復見之

黃蠟青沙未破封已知雙井社前烘一丘風味極不淺  
萬頃烟波興不窮東晉書齋顏歷後西湖山色有無中  
危欄傑閣明人眼獨覺登臨欠此公

從叔君冕見訪山間自云平生躬耕釣無求於人  
中有至樂令某作詩寫其蕭散之狀為賦此篇  
青鞋布襪綠蓑衣滿目秋江白鳥飛小楫扁舟乘興出  
斜風細雨釣魚歸有間茅屋臨蒼巖尋箇樵夫上翠微

閒趁牧童吹短笛倒騎牛背入柴扉

次韻劉升卿惠焦坑寺茶用東坡韻

焦坑因東坡始見重於時

日出城門啼早鴉杖藜投足野僧家  
非關西寺鐘前飯要看南枝雪裏花  
玉局偶然留妙語焦坑從此貴新茶  
劉郎寄我兼長句落筆更如錐畫沙

送歐陽廣明遊仰山兼簡慈書記

閣中有小釋迦金襴袈裟

士窮不作儒生酸歲晚聊為物外觀  
行脚僧從幽徑出集雲峯倚半天寒  
且攜幾兩登山屐勝走高門坐馬鞍

金屋藏書  
卷九十一  
君見堂西舊書記試求開閣看金襴

送任子嚴江西運幹

正坐慙羹吹冷齏送君那復有新詩明朝便恐隔千里  
抱病何由把一卮西蜀文章自家法江南烟雨上樓時  
東湖滕閣多佳興落筆端能寄所思

次韻郭偉節段延直見寄

辰溪古夜郎郡  
太白嘗謫焉

山霸未忍勒銘移空有寒鴉噪竹枝二妙相逢春霧裏  
老夫將竄夜郎時傳看尺素雙魚尾突過黃初數子詩

不上沅江探奇絕平生誰有一來茲

春晚同石子文遊歐陽叅軍園問其主人已物故  
獨一老婦開門亭檻幽雅醑醺方盛開因歎二  
年卜居隣巷相去數十步而未嘗一到作詩記  
之

居鄰曲巷有朱扉未許牆東宋玉窺春草滿池驚晝夢  
醑醺萬朶壓繁枝湘西江上叅軍宅黃四娘家子美詩  
他日沅陵尋故事為余收入楚人詞

閏十二月自城東泛舟遷居城西安福寺舟中微

雪

朔風吹雪江上來急漿迎風蕩不開渡口雲巖伏波廟  
山腰霧失楚妃臺移居自作泛舟樂抱甕還如載酒回  
歲晚浮家寄何處兩溪春水綠如醅

劉時舉主簿相別三十年忽相遇於沅湘之間古  
夜郎郡也郡索窘俸饋不繼垂索而歸相聚月  
餘賦詩為別

謫仙適竄夜郎道主簿歸從飛鳥邊但喜騎驢得佳句  
忽忘揮麈是何年且將肚束三條篋敢望腰纏十萬錢  
剝斬湘南幾竿竹他時分我釣魚船

送頔子還廬陵

頔子遠來夜郎省余聞其婦方臥蓐不欲久留而戀  
戀不忍去乃令上沅湘至昔人窺九疑處得下武陵  
溪入荊州由巴陵武昌洞庭黃帝張樂之野觀開闢  
以來造化擘出瓌雄怪謫之處却由瀟湘以歸敝廬

作數語示之明日乃行

東歸未辦武陵舟送汝翻成一段愁  
雪點敝裘騎瘦馬  
春寒幾日到荊州  
湖山天開洞庭野  
吳楚月明黃鶴樓  
莫苦回瞻白雲嶺  
是行聊學子長遊

次韻李宜仲見懷朱崖夜郎二逐客

不因貴賤識交情  
此段當令後輩傾  
三友一龍吾作尾  
同時四海孰為兄  
殊方少客通南北  
厚祿無書訪死生  
萬里歸期應可指  
九衢先聽賣釵聲

辰州僻遠乙亥十二月方聞秦太師病忽蒙恩自  
便始知其死作詩悲之

辰州更在武陵西每望長安信息稀二十年興縉紳禍  
一朝終失相公威外人初說哥奴病遠道俄聞逐客歸  
當日弄權誰敢指如今憶得更依稀

次韻段季裕惠詩

身墮西南海角邊是中樂事亦天全漸聞長樂鐘聲近  
正遇巫陽敕放年客過茅蓬非率爾詩如錦繡益飄然



一罇豈盡平生話咫尺高樓起暮烟

初至行在

望中樓閣入青冥疑是長安舊帝城千里荷花開世界  
幾年羈旅望神京老隨丹詔身猶健夢入華胥眼尚生  
行盡沙河塘上路夜深燈火識昇平

胡邦衡移衡州用坐客段廷直韻

朱崖萬里海為鄉百鍊不屈剛為腸復出光芒動星斗  
定隨雷雨起江湘歸期正待春回鴈賀客爭持酒滿觴

笑說開元丞相宅淒涼偃月上標堂

送頓子歸廬陵

西風吹我夢魂驚送子東歸無限情  
好往沅湘探竒絕遠看衡嶽正崢嶸  
黃昏渡口呼船急後夜江頭望月明  
能把愁心寄明月雲開時到夜郎城

次韻周穆卿教授兼簡黃元授司戶

嘗記楓宸賜異恩同時人物亦詵詵  
從前百事不掛眼初得微官便退身  
教授才華欺蜀錦參軍詩句似唐人

中興勳業歸公等顧我徒為避世民

次韻歐陽廣明以詩送鉢孟

方大盈前送八珍山人不是此中人試尋僧鉢齋厨近  
更喜園官菜把新秋滿城頭看落葉風吹酒面已生鱗  
何時共過溪邊寺雪夜扁舟發興頻

贈胡紹立

并引

紹立頃年遍遊西南諸州聞余竄夜郎冒重險至沅  
陵由湘南以歸已卯秋預清江高薦復至安成訪別

道舊賦詩因以送行

憶昔烏蠻絕塞亭巴娘歌罷月三更  
重尋湘水江邊路又見蕭灘榜上名  
此去飛騰對天陛不應顛顚困書生  
將軍三戰成功後未數焚舟老孟明

謝向提刑見訪

并引

某自貶所東歸伏辱提刑直閣千里命駕來訪  
死生感激高義輒成長句聊伸謝懇

夜郎逐客遇生還秘閣老翁來扣闕  
坐聽犀揮妙言語

慚非樞具偉衣冠高名業已照六合賤子窮當隱半山  
陸納家風元冷淡自將茶果薦杯盤

渡湘千里憶分攜因誦癡兒不了詩送我出門還作惡

今朝會面豈前期樂天獨往青山日裴相閒居綠野時

從此功名恐相逼伊山安得久棲遲

李訓王涯排陷樂天訓等死日樂天

正游洛下青龍寺有詩云當君白首同歸日是我青山  
獨往時或謂白公樂禍東坡云樂天豈樂禍者特悲之

耳余今  
亦然

和讀書臺入夜即事

池底星光箇箇添半鉤斜月吐纖纖數聲寒笛西風下  
人在朱樓捲暮簾

兵火之後家藏墳籍蕩然寄居江村欲借書諸公  
先寄此詩

卜築江村翠嶺坳喜君書室近衡茅牙籤插架幾千冊  
準擬從頭借一抄

聞道藏書埒石渠仍能一讀五行俱不妨借我遮愁眼  
勝著閒窗飽蠹魚

全宋詩 卷九十一  
次韻盧元贊江亭即事絕句

江水磨銅鑑面寒釣魚人在蓼花灣雲開貪看新月上  
不覺小舟流下灘

次韻劉英臣早春見過絕句

春至盤蔬有蕨芽紙窗竹屋自成家客來清坐不飲酒  
旋破龍團潑乳花

雪中遇胡烈臣歸自郴陽戲成一絕

路旁有客騎牛過乞與蓑衣作席眠邂逅若能相顧問

和公畫上釣魚船

和康晉侯見贈

儒生無力荷干戈，亂後篇章感慨多。  
但拏筆頭吟白雪，莫挑馬箠渡黃河。

次韻陳君授暮春感懷

雨餘山鳥百般啼，烟隔桃蹊一線微。  
南北東西春總好，杜鵑何苦勸人歸。

董仲儀來夜郎訪死生



雪覆鬼塋山頭路霧失鬼門關外村不謂故人千萬里  
忽攜書冊夜敲門

次韻酬國子生趙秀才

淵明五柳非無宅子美西枝自有村堪笑長安近時客  
紛紛騎馬傍誰門

竄居夜郎雪中杜門數日不出忽郡中送春來始  
知今日立春

東風來從幾萬里雪擁江梅未放花忽見土牛驚換歲

始知春色到天涯

郭仲質南窻

東風吹月下長汀  
窻外雞號天猝明  
時有諸生來問字  
隔江猶聽講書聲

夜坐聽沅江水聲

雨過風林生夜清  
坐邀明月正關情  
漁童酒醒莫吹笛  
要聽一江秋浪聲

寄子老

并引

予老自江西來赴沅州報恩謂必取道辰陽翹俟久之忽得書乃趨徑路去已開堂矣奉寄絕句以當相見也

半程蹉過夜郎溪不到昌溪問路岐空使辰州亭下客  
隔江招手立多時

贈別陳君授

并序

紹興十九年余坐詩語竄夜郎偶太學生陳君授前  
二年上書言事忤秦太師意亦貶居是州二十五年

冬秦太師病死遐方未及聞聖上慨然施曠蕩之恩  
盡放流人某與君授始獲生還感恩出涕作二絕句  
贈別

十載投荒坐獻書忽逢飛詔下荆巫歸來好上昇平頌  
已死姦諛不足誅

雷雨沅湘振滯冤皇恩普出九重天乞兒猶戀權門火  
應謂死灰能復然

離辰州

逐客休嗟行路難  
歸鴻心在杳冥間  
初驚草尾千重浪  
險渡湖頭十八灘

行盡黃茅白葦叢  
舉頭忽見兩三峯  
青青畫出湘天景  
如覺身離蠻蜨中

次韻任子嚴

并引

余竄夜郎日  
惠門僧祖麟  
徒步萬里訪  
生死東歸過  
其寺見壁間  
題詩乃故人  
任子嚴見懷  
嘉麟之義而  
嗟拂之也時  
士方以詩為  
諱而覩此作  
感激次其韻

解訪江南處士廬行藏正自與時迂題詩更及夜郎客  
此段如今絕世無

君是石渠東觀人小邦聊見宰官身山僧似不孤題品  
衆角叢中有一麟

次韻周孟覺記皮老人事

皮老九十餘歲能談熙  
豐以前事但稍聾耳

百年人物已無餘況說銅人鼓鑄初欲著承平舊時事  
政須此老助潛夫

何物龐眉一老翁能談慶厯至熙豐只應坐厭聽鞀鼓

卷九十一  
到處逢人說耳聾

人壽何曾有百年再逢甲子換新元  
眼明重見清平日  
自可治聾聽好言

贈日者張谷

余竄夜郎八年東歸至長沙遇日者張谷考十年前  
所言皆不謬余雖老然壽則非君妙術所得而推故  
末句云

夜坐吟詩竄夜郎君將何術考休祥  
近來偷得西華法

不敢煩君算短長

夜郎歸日答葛令惠詩

七載投荒萬里餘  
交遊半作曉星疎  
門前梅柳換新葉  
忽得故人相問書

避亂鵠湖山贈寺僧

岩下逢人說亂離  
十年眼底厭旌旗  
兵塵復暗江南路  
堪羨山僧總不知

初寒方葺火閣而會溪城周子康惠竹簾火爐甯



公端惠蒲團便足了一歲無事矣作二絕答之  
細柳將軍來護塞夜郎遷客正窮居火爐恰恰簾垂地  
足了三冬讀我書

戶外霜風入骨酸誰塞紙閣問平安正憂坐客寒無席  
遺我新蒲入突藥

宋詩鈔卷九十一

欽定四庫全書

集部

宋詩鈔卷九十二至五

詳校官中書臣賈錢

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷九十二

內閣中書舍人吳之振編

漫塘詩鈔

劉宰字平國金壇人紹熙元年進士歷江寧尉真州  
司法泰興令以浙東倉司幹官告歸監南嶽廟累召  
不起隱居三十年卒謚文清宰以吏事稱而淡於榮  
利一時朝廷所不能致者宰與崔與之耳詩亦常調

而五言古稍優

次王兄韻

野徑梅初發寒塘草又生能來同社酒莫笑瓦盆盛

過尤溪

尤溪塘上征人路記得停驂一解顏十載重來兒女換  
似曾相識有青山

過剡溪

青山疊疊水潺潺路轉峯回又一灣想見雪天無限好

不妨獨棹酒船還

題石門奉真觀

疊障為屏石作門  
陰雲漠漠雨昏昏  
清游到晚不知去  
要上峯頭望曉暎

舟中

蓼岸著花紅半吐  
稻畦過雨綠平鋪  
炊烟起處三家市  
却向江湖憶畫圖

秋懷

一抹紅綃日脚霞千林暮靄納歸鴉西風捲盡梧桐葉

乞去聲與中庭散月華

雲邊阻雨

薔薇籬落送春闌笳甚園林早夏間牛背牧兒酣午夢

不知風雨過前山

謝趙使君豁租

長榜朱書又墨書使君頒令豁逃租一千里內歡聲滿  
十數年來此事無

得軒即事

上印還家不計年，水光彌望木參天。  
綠雲洞裏

嘗名漫塘，上為

綠雲洞天開書幌，紅錦波心漾酒船。

送鄭節夫

盛年已去壯心闌，此別懸知後會難。  
顧使乾坤同日月，不妨閩浙異江山。

發紹興

留滯青春晚經行，此日初柔條桑著眼。  
短穗麥生鬚竹

外雲埋屋花邊水遶渠箇中容我老肯遺子公書

馮公嶺

地隘山逾峻人勤俗不奢時培石上土更種竹間茶接  
畛田成篆連筒水濺花征塵如不到老我即東家

長林海邊道上

海霧曉逾合海風春更寒哀顏欺薄酒老膽傲驚湍隔  
岸人家近平沙客路寬明朝應更好山翠撲征鞍

松江道中



久作松江夢重來泛短篷  
淡雲飛急雪枯葉戰狂風  
烟末三家市波心一釣翁  
鴟夷身計耳吳越等成空

寄同年朱景淵通判六首

念昔從子遊金陵佳麗地  
幕府盛賓僚東南稱兩尉  
子才清而通我拙世無二  
櫟社雖輪囷靈根同晚歲

當時最少年雪林紫芝翁  
詩名三十年正復坐此窮  
落日澹平湖宿草鳴寒蛩  
何時一樽酒往酌與子同

謂趙紫芝

汝淳

四海游夫子粹學洞古今聞善亟推輓常恐力不任時  
危係長才白日已西沈拱木戰寒風淒其千載心

謂游默齋

九言

茂苑子周子慷慨憂時危斯文晁董流炳炳日星垂言

深衆所驚用淺才不施穹窿山下笛懷人究誰其

謂周正字

南閨

滕子嗜古學萬卷作生計孤燈耿夜闌盜畏不敢睨至

寶世不售虛名竟何利尚想古城隅幽花開繞砌

謂滕實

細柳真將軍勁氣可立悞向來拯時危功畧天下半屢  
詔不肯起出處懸自斷十載山澤游萬念春冰渙何當

求識面介子同里閨

謂周馬  
帥虎

### 題王荊公半山圖

歸來心事平蹇驢踏秋風舉鞭問髯奴何如浣花翁道  
旁幾高松風來自相語桃李今何之歲寒予與汝

### 題茅山潑墨池慶雲庵

路轉幾山腰言尋雙海眼澗落呂公泉橋橫蜀道棧主

人去不歸山空春事晚

闕

蔬筍開門延客飯

北固山望揚州懷古

北固城高萬象秋  
烟竿一縷認揚州  
試乘綠漲三篙水  
要見朱簾十里樓  
淚濕宮衣朝霧重  
愁薰寒草夕陽浮  
隋堤舊事無人問  
兩兩垂楊繫客舟

懷林維國

予學宦金陵得三山林維國邵武任伯厚吳門朱景淵  
婺女葉潛仲為之友相得歡甚維國知我愛我視

他友爲甚惟恐予有過差一夕四人相會於潛仲解  
舍抵足達旦始各自誦所短而誦人所長終也自言  
其長而誦人之短遞相規益其友愛如許維國去金  
陵未二年終於永嘉予亦離羣索居無復朋友之益  
辛酉十月初五日夜忽夢與維國遇如平生歡覺而  
悽然成二詩

四海論交二十年知心一見似前緣情親尚記通宵語  
忠告難忘送別篇夢入蓬壺重會面座看書史尚堆前

應憐廢學從農圃要使留心在簡編

尚記升堂拜母時滿前兒女競牽衣鳳雛想見今成立

雁序遙聞已奮飛

維國弟成已  
已發浙漕解

身後聲名終不朽家傳

詩禮足相輝傷心白下金陵道無復班荆話昨非

寄潘子善上舍

時舉

陳少陽率太學生伏闕上書六賊遂退天下快之少

陽猶以後書論李邦彥白時中等言不用拂衣去近

傳太學伏闕書是歟非歟非山間林下所得知獨怪

朝廷不用其言諸君猶苟安於學豈以靖康時事視今日緩急異耶為賦五十六字質之同志者

少陽一疏折羣姦拂袖歸來日月閒誤國小人

書中語猶

法從叩閭諸子自賢關是非頗亦通千古義利那能立  
兩間若向西湖浮畫舫好傾危酒酌孤山

送邵監酒兼簡儀真趙法曹呈潘使君

儀真來往幾經秋風物淮南第一州山勢北來開壯觀  
大江東下峙危樓沙頭縹緲千家郭艫尾連翩萬斛舟

去去煩君問耆老幾人猶得守林丘

和張寺丞謝惠河魴韻

先生盛德信光亨微物將誠愧晚生  
春岸正當餘雨過寒江尚想小舟橫  
一奩走送慙遲暮兩舍相望欠割烹  
未必甘芹解知味王公當諒野人情

送王去非入餉幕

春歸花藥尚紅酣送子脂車馬在驂  
幕畫向來多實用事機今可付常談  
學方用力須千百事或當仁勿二三



別後欲知漁釣處五湖天水共澄涵

送衛汝積歸句曲

汝積歸路過獨樓岡入亭子谷二處相去里許而下  
瞰數百里丘陵川澤若錯繡然谷中縈紆峭險下有  
流泉疑有幽人勝士嘗建樓岡上以極臨眺著亭谷  
中以貯幽勝以其亭多而樓獨故曰獨樓柳子厚所  
謂游之道二曠如也奧如也此蓋兩得之歲久樓傾  
亭廢而名尚傳若鐵爐步然山居皆樵蘇之人無能

解其義者遂意獨樓為髑髏而以谷為孔是又與小  
姑嫁彭郎同義吁可嘆也因汝積路出其間為辨證  
以刷是岡之恥

樓岡亭谷萬山西縹緲炊烟出翠微歸路正當清晝永  
離懷莫悵白雲飛學醫要使人無費問道須知昨已非  
好向庭闈商畧此短章中或有玄機

仲玉和前詩見贈因再用韻

官倉出粟徧東西多謝朱公念隱微但覺閭閻猶菜色

不知園囿已花飛當年國論無同異此日民言有是非  
天上鴛鴻方刷羽海邊鷗鷺已忘機

漫塘晚望

霽色催雲作晚霞小橋却立岸烏紗雨餘菱芡新抽葉  
秋早菰蒲未著花燈影微茫行客艇鐘聲縹緲梵王家  
沈吟索句輸公等我欲臨流理釣槎

寄陸大夫

寄語金閨陸大夫歸田相府竟何如提兵劫取已非矣

縱火燒殘豈義歟百口喪身端自爾千錢酬直殆欺余  
放翁舊隱佳山水賸好歸歟理故書

社日僧舍風雨

借蔬香積共晨炊客裏良辰總不知孺子從渠均胙肉  
南翁無處聽巴詞神鴉得志飽終日巢燕有心來及時  
風雨聒人聲轉甚半鍾濁酒可能治

寄題戴氏別墅

聞君築室水雲鄉一榻翛然獨老龐近挹荷香供几案

遠邀山翠入軒窗自歌自笑遊魚樂時去時來白鳥雙  
何日過門成夜泊一樽相與對銀缸

趣劉聖與

用行

寓玉甫桂墅

門外平湖百頃寬庭前翠竹遶欄干鳥啼花笑四時好  
几淨窗明六月寒臙可琴書供晝永不妨絃管到更闌  
留行莫為歌楊柳作計應須趣牡丹

送戴子家歸永嘉

桂

君住柵溪第幾山我家北渚水雲間二千里遠來非易

三五朝留勿作難有子已知頭角異安心寧恤髣毛斑  
尺書頻寄問無恙共樂生前日月閒

癸未寄王甥

別時庭戶正秋清  
盡見園林翠織成  
吳下余思頻刮目  
渭陽子豈遂忘情  
堤間飛蓋分垂柳  
水面浮舟約半萍  
乘興時來共清話  
相望能隔幾牛鳴

開禧紀事二首

泥滑滑僕姑姑喚晴喚雨無時無曉窻未曙聞啼呼更

勸沽酒提壺蘆年來米貴無酒沽

婆餅焦車載板餅焦有味婆可食有板盈車死不晚君  
不見比來翁姥盡飢死狐狸嘍骨烏啄眼

謝烏鵲

朝來不成寢啼鳥繞西東似欲砭我愚無虞終有凶挽  
衣行太息飛鳴鵲當空似欲慰我心正直神所容舉手  
謝烏鵲憂喜當何從吉凶兩不到我在阿堵中

松風軒晚望

遠山亞歸雲近山留夕照澄江橫淨練怒風收衆竅東  
南佳山水此地宅其要連覺三萬家金壁互輝耀間房  
列歌舞饒觀富登眺物理會有極却慮成悲嘯我家三  
茆峯一室倚青峭下有荆溪水水深魚可釣歸歟有成  
計靜坐觀衆妙功名付公等連茹祇明詔他年問無恙  
短策寄嶺嶠浩歌暢幽懷狂斐君勿誚

和李果州

道傳

同遊茅山贈

我家荆溪東矮屋八九間石田人不耕自占水一灣十



年去城市樂此清晝間飽聞西州英奧學窺孔顏見賢  
豈無時冰開水潺潺竭來絜齊俟一語開冥頑錦機神  
所秘啟視不吾慳追隨妙高臺勇往不作艱蹇步驅弗  
前逸駕杳難攀惆悵默無言詩卷慙空還三茅在何許  
天末聳髻鬟勝處不可窮老我常窺斑幽人去不歸夜  
鶴守松關夫君金玉姿秀氣超人寰興來得同遊句就  
知難刪應同太史筆有副藏名山

趣劉倅聖與建第

鷦鷯巢枝寬大鵬溟海窄不齊物之情小大貴安宅一  
區揚子雲衡宇陶彭澤何妨輪鞅稀所憎塵市迫吾宗  
攜家來寒暑已屢革寓舍得賈區開門即廣陌四鄰共  
壁立而無藩牆隔畫通燔炙芬夜悉笑語啞麕至窘賓  
朋雨立愧減獲傳聞三徑地經始得長策良材蔽闕  
賤售非難索露廩發陳積香飯留匙白羣工闔戶外拱  
手聽規畫願速大厦成却展搏風翮

次聖與小兒啖虎脯篇

折臂最小兒骨聳額微廣弗說螺螄小可以吞大象那  
敢謂其然且幸日稍長顧似陶家郎智識殊不與強令  
侍師席跳踉繞函丈胡能辨滋味舍魚取熊掌但見蔬  
果列攫取如技癢嘉餽得虎鬻新獵出林莽對之懶下  
箸殺氣猶可想呼兒食之既睥睨尚來往饕餮我所羞  
跌蕩或稱賞服猛豈渠能過獎謝吾黨深慙如敝帚有  
誤千金享

走筆謝王去非遣餽江鱗

環坐正無忪駢頭得嘉餽鮮明訝銀尺廉纖非蠶尾肩  
聳乍驚雷腮紅新出水笔以薑桂椒未熟香浮鼻河魴  
愧有毒江鱸慙寡味更咨座上客送歸煩玉指飮餽雜  
青紅百巧出刀匕翩翩鶴來翔粲粲花呈媚頗疑壺中  
景髣髴具盤底又疑三神山幻化出人世更於屬饜餘  
想像無窮意知君束裝冗不敢折簡致厚賜何可忘因  
筆聊舉似

再韻為鱗膾虎齧解嘲

多病早休官自是臺無餽東門享鷄鵠寧若龜曳尾有  
酒可斟酌有力給薪水朗詠淵明詩如斷郢人鼻所期  
免朝飢敢幸嘗異味大哉來鄰邑細縷出纖指一見喜  
折屐三思食失匕珍非我可常竈非吾敢媚胡可徇口  
腹有若囊無底諸君有用學士苴足經世龍肝與鳳髓  
何求不適意此豈費萬錢正自不難致貴賤理則殊氣  
味固相似

分韻送王去非之官山陰得再字

達官須親民未竟法應再昔君治姑孰報政甫初載桃李春正華風木養不待至今田里間往往誦遺愛薦章交公車夷塗了無礙自詭更治民得邑仍勇退坐看積薪上笑謝及瓜代赤縣官山陰銅章喜重佩平湖帶城郭崇山鎮溟海道中勤顧接何者非勝槩鵝池湛清漣蘭亭霏翠靄溪流西走剡夜雪曾訪戴此地君故家舊遊詳往載公餘信足樂俗敝良可嘅盜賊人鬪狠淫祀家穰穰緩縱固不可激之或生害厥田惟中中厥賦上

上倍豪家窘輸送勾合無容貸貧家慣逋負符移費追  
逮行之苟失中上下交怨懟臺府相鼎立征求常意外  
稽違速譴呵抑絕虞冒昧犴獄當盡心夜寄或百輩去  
來不敢詰猶豫即招悔薛徒陷平民更欲闕 臯朝方

得其情暮祈當路改過客紛如織刺口說行在丐求小  
不愜百計工組續我知夫子心此去專勞來豈其懾聲  
勢左盼而右眎然須處心平更須臨事耐勿恃事理直  
抗論多慷慨勿謂氣類同不虞趨鄉背先入勿偏聽未

信勿忠誨少違歲月間足致治平最庶策三載勲亟應  
千齡會

贈江西吳定夫

定夫江海士瘦骨如臞仙翩然及吾門不假左右先我  
方厭塵埃一笑喜相延肩懸雨破囊既見始解纒我欲  
具杯酒割鷄烹小鮮自言乃長齋不受世葷羶少林入  
西山幽尋徧崖顛山空四無人白眼問青天洞口得老  
翁守死易一編高談慰寂寞其然豈其然去去不忍別



解衣示勤拳及歸已彌旬為我少留連道逢一病媪背  
偻兩足攣津頭見羈旅數口依敗船料理窮晨昏奔走  
環市屋足攣不良行結廬依牆垣船敗不可航買舟捐  
萬錢為慮極靡密要使終安全詰旦擬東還既夕重周  
旋嗟子塵外客而結區中緣吾衰不能爾愧汗與涕漣  
或疑破囊中探用若流泉子豈費長房一壺掛簷前或  
疑瞿曇老濟世法無邊勤君為此來闕頸警沈綿君師  
魯東家二說當捨旃理一而分殊先儒有遺言君歸更

高畧書來慰殘年

送魏華甫侍郎謫靖州

靖州風物最五溪  
畬田歲入人不飢  
淘沙得金邀以嬉  
瘴烟不逐嶺雲西  
六花瑞臘春臺熙  
尤便逐客過往稀  
理亂黜陟了不知  
夫子豈欲居九夷  
要尊主勢扶時危  
有言不用時我違  
播然不受好爵縻  
向來鄉行誰可睎  
平生易名慕者誰  
蘇陳凜凜百世師  
畏塗萬折甘如飴  
求仁得仁固其宜  
大明當天照隱微  
直前一疏可忘之

江頭後會端有期  
暗香微動寒梅枝  
臨別不用長歎咨

石翁姥

采石江頭風畫息  
掀天雪浪平如席  
沿涯小泊客心寬  
攀蘿曾看望夫石  
天涯望斷人不歸  
露寒猶想淚霑衣  
爭似石翁攜石姥  
年年對峙夾岡道  
人歸人去我何心  
雨沐風餐人自老  
比翼鳥連理枝年  
多物化徒爾為長  
生殿裏知不知

鴉去鵲來篇

昨日鴉鳴繞庭樹道上行人色驚懼試呼行者問如何  
身為戶長催殘稅殘稅自昔稱難理三年尤非四年比  
加之逐保有逃戶每一申明官長怒人逃信矣田不逃  
其奈逃田不知處厥初經界失區畫比近立租相什伯  
大家置產錢欲輕小家鬻產價欲增上田只割下田賦  
賦存田盡因逃去或因土瘠遂流移歲久田侵人不知  
更有鄉胥迫科抑多推少割隨胥臆民愚而神難盡欺  
往往增入逃戶籍以茲逃戶日增多戶長蚩蚩奈若何

向來差役多輕重戶長之中中產衆比來里正多義役  
各欲供須有全力搜羅中產無孑遺戶長人人家四壁  
官司禱雨徧明神施行寬政蠲房緡房緡僅可寬遊手  
那得實惠霑農民千錢代輸猶可出今日方輸又明日  
父兮母兮叫不聞遺體鞭笞同木石日日鴉鳴期會到  
血洒公庭深不掃遂令著處聽鴉鳴冤飛鬼散心如擣  
和氣致祥年致異已甘旱魃來為祟忽驚鴉散鵲交飛  
高枝報喜仍低枝萬口歡呼聲動地府今盡放三年稅

曳鈴走卒天上來立張大榜當衢市黠胥駭愕頓兩足  
戶長仰天攢十指瘡痕未愈失呻吟感激過深仍涕淚  
又說新租亦寬限四年舊欠寧不爾亦知經賦難逭責  
少紓庶可容催索使君從善真如流仁人之言為慮周  
畫諾一時良易幾人共拜更生賜人意會同天意感  
急足未回時雨至始知此術勝祈禳開闔陰陽俄頃耳  
何妨甘澤尚愆期我作此詩禱告之象龍可仆蜥蜴縱  
蛟龍自起霹靂隨謂予不信難強語請驗吾邦今日雨

詩成欲謝更有祈新租輸送此其時分科本色歸上戶  
細民勿使折納遲四年逃閭尚充數積弊那能倉卒去  
且應除豁見真的孰恃强梁敢逋負若然民病八九瘳  
閒暇何妨版築修推排得人敞可見逃租十失五可收  
更令義役廣前制戶長里胥同一體庶幾二役適均平  
不使貧民偏受敝豈惟澍雨快一朝縱有凶年皆樂歲  
報喜不惟乾鵲噪丈人屋上烏亦好

野犬行

嘉定已  
巳作

野有犬林有烏犬餓得食聲呶鳴烏驅不去尾畢逋田  
舍無烟人迹疎我欲言之涕淚俱村南村北衢路隅妻  
喚不省哭者夫父氣欲絕孤兒扶夜半夫死兒亦殂屍  
橫路隅一縷無烏啄眼犬銜鬚身上那有全肌膚叫呼  
伍伯煩里閭淺土元不蓋頭顱過者且勿嘆聞者且莫  
吁生必有數死莫踰飢凍而死非幸歟君不見荒祠之  
中荆棘裏鬻割不知誰氏子蒼天蒼天叫不聞應義道  
旁飢凍死



猛虎行

市有虎母妄言當關虎士森戈鋌市上一呼人駕肩虎  
雖猛那得前市有虎言非妄君不見左馮諸邑天下壯  
斧斤聲斷林壑空猛虎通衢恣來往食人肉飲人血沈  
痛積冤何可說凝香堂上紫烟浮風流太守憂民憂一  
朝下令開信賞籍皮枕骨彌山丘虎已滅人患絕夜永  
猶聞泣幽咽泰山之側如何居子後夫前甘死別

運河行

運河岸丁夫荷鋤聲綠亂紅蓮幕府誰獻言運河泄水  
由函管函管掘開須到底運材歸府供薪爨庶幾一壞  
不可復民田雖槁河長滿民田為私河則公獻言幕府  
寧非忠我聞此言為民說急趨上令毋中輟小民再拜  
為我言函管由來幾百年大者用錢且十萬小者半此  
工非堅厥初銖積費民力厥後世世期相傳豈但旱時  
須灌溉亦憂久潦水傷田向來久旱河流絕放水練湖  
憂水洩州家有令塞函管函管雖存誰復決小須雨澤

又流通函管猶存不費工只今掘盡誰敢計但恐民田  
從此廢豐年餘水注江湖涓滴不為農畝利有時驟雨  
浸民田水不通流禾盡死況今農務正紛紜高田須灌  
草須耘盡驅丁壯折函管更運木石歸城闔呂城一百  
二十里不知被擾凡幾人太守仁民古無比凝香閣下  
寧聞此願傳新令到民間函管須塞不須毀已填函管  
無尾閘大舶通行水有餘函管不毀民歡娛異時瀦瀉  
無妨渠憶昔採詩周太史不問小夫井賤隸試來俚語

扣黃堂鈇鉞有誅寧敢避

殺虎行謝宜興趙大夫惠虎皮虎腊虎睛

君不見陽羨周將軍射殺南山白額虎千古萬古聲流  
聞又不見宜興趙大夫南山三十有六虎令行殺取無  
復餘一虎昔何少三十六虎今何多虎多人不患所患  
政之苛苛政滅人門猛虎戕人命擇禍莫若輕泰山之  
人論已定大夫性高明下令走風雨所知在田里了不  
見臺府既令民免政之虎又與民除虎之苦四境之民

歌且舞或云殺虎太傷和胡不令渠自渡河我聞此言  
笑且呵大夫憂民憂豈必限吾土不然鄰國以為壑信  
也白圭愈於禹古陽羨今宜興大夫邑之主將軍邑之  
賓主賓多寡事不同千古萬古同清芬

用前五字韻趣劉聖與建第

君不見茅屋下四壁牀數窄又不見朱門中金碧鎖空  
宅宅成更欲致良材水浮陸走空山澤茅屋區區誠已  
疎朱門汲汲彼何迫勸君勿學伏波老自詭裹屍須馬

革又勿學金谷人綺窻阿閣綿阡陌但令庭宇潔頗與  
塵囂隔市聲不至亂琴書厨烟可免衝咽啞庶幾家人  
安亦使我心獲吾宗開敏姿富有濟時策棟宇著易象  
義不假探索

宋詩鈔卷九十二

欽定四庫全書

宋詩鈔卷九十三

內閣中書舍人吳之振編

義豐集鈔

王阮字南卿豫之九江人朱子講學白鹿洞阮從之  
遊慶元初孽臣竊柄附者如市阮未嘗一躡其門晚  
守臨川陸辭奏事柄臣密客誘致之迄弗往見奉祠  
而歸其詩得之張紫薇安國故不為徒作有義豐集

代胡倉進聖德惠民詩

平楚皆膏壤成湯忽旱年人知聖慮切恩遣使臣宣乙

卯飢荒後長沙富庶全紀年四十載斗米二三錢

潭州自紹

興五年一旱後豐稔三十八年

縣縣人烟密村村景物妍朱蹄驕柳陌

金鐙麗花鈿

長沙自唐號小長安朱蹄金鐙杜甫所云

習此民成懶加之吏

不虔力耕終苟且勸課或遷延綠野田多曠潢池惡未

悛曷嘗修稼政但見飾賓筵豐稔時難保盈虛理有還

自應成赤地安得咎蒼天義廩真良法

常平

皇家以備先



積倉何止萬存數僅餘千

潭州每歲正苗三十八萬石每石收義倉一斗自乙卯至

辛卯當有百萬石臣到任點檢僅存四萬石

濫以疎庸迹來司斂散權一身

初抵此四顧但茫然奏發常平弊財蒙內帑捐敢云呈  
敏手幸免奮空拳蔑問秦輸閉專稽稷懋遷陸修流馬  
運水作汎舟連凡屬災傷事深將利害研兼并勤告諭  
商旅漸喧闐市直雖翔踊官收却痛蠲北來因鼎粟南  
至出渠船分路招糴廣求自靈渠出稍稍收成廩紛紛出著鞭起於  
衡嶽趾環厥洞庭舷湖北疆參錯江西境接聯里雖千

萬遠身亦再三過必務經行遍深防賑給偏規模頌郡  
吏出納謹鄉賢敢避風兼雨周爰陌與阡有時沈水底  
鎮日上山巔不復通舟楫寧容坐馬韉履多穿石仄棠  
慣濕河壩江步時時到村虛日日穿

楚語以江岸為  
步村市為虛救

頭方甚急援手詎辭胼疔昔雖多病馳驅却自痊已成  
迷曉夜不復憚山川松徑行時蓋楊花坐處氈光華雖  
備使蕭散類登仙林密花頻剪途窮木可緣石歌行恐  
壓溪漲涉疑漩昔出正初吉今經六下弦

以正月出巡  
七月還司

奔忙馳似箭來往轉如圜王事歌苞杞歸心却杜鵑力  
雖疲險阻志務報陶甄憶昨初行日蕭然亦可憐餓羸  
皆偃仆疾疫更牽纏詎止家徒壁多遺屋數椽葛根殫  
舊食竹米繼新饘

去冬人食葛根  
今春又食竹米

畧救朝昏急終非肺

腑便聲音中改變形質外羸羸氣茶胸排骨神昏眼露  
圈步歎身欲仆頭褪髮俱卷婦餒心成疾兒啼口墜涎  
亂花生目睫炎火亢喉咽裊裊渾無力昏昏只欲眠盡  
孳持耒手頓削負薪肩狀貌已成鬼號呼幾亂蟬獸窮

思曠野魚困想清泉山僻無人到帷驚有使寨初聞爭

欲走稍定使來前爾俗飢雖困吾君施體乾知民方疾

苦遣吏撫迤邐置院收鰥寡分場賑市廛貸糧招復業

散種使耕田

臣嘗乞以米五萬石依條給貸四等以下戶又以穀三萬石分諸縣借給寒給

余裒暖

給織襖

春頒藥劑煎凡今嚴吏責皆是恤民編稍

見兒童集徐看父子牽共爭扶杖聽咸樂置郵傳茶獻

迎門禮香浮夾道烟耳聞身鼓舞心切涕潺湲坐定徐

言此從來未見焉一時愆潤澤萬里奏艱鮮灌溉非無

桔槔度亦有在畚乾終損粟池涸竟枯蓮詩駭周宣魃  
經書魯國蠃坐令民皤皤翻作泣漣漣平日安豐稔今  
朝乍疾顛老羸如病馬壯健若飛鳶忽見皇恩沐親馳  
使命專聽言初挾纊拜賜悉鳴絃新歲天心格經時雨  
勢綿東皋耕澤澤南畝溜濺濺坎豆皆勤作根涯悉勉  
旃水耕榮嘽嘽陸種茂芊芊件件絲盈軸方方麥薦蘩  
楚語以種物為坎豆勤苦為根  
涯以足為件以三升為一方  
指知食欲動目望酒先  
攢舍北行歌暢村南伐鼓淵魚占何必夢斗覆已明驪

甲子晴尤好嘉平雪記填自今知歲歲王道永平平撫  
已叨逢主占星辛備員耳親聞擊壤手敢廢題牋農事  
修其職邦基賴以堅但令倉廩實何患犬羊羶商克周  
饑止邢存衛雨愆定知豐稼穡端在講戈鋌足食繫兵  
法行糧詠雅篇願陳王朴論一稔遂平邊

王朴邊策一  
稔之後可以

平邊

上九江唐舍人文若一首五十韻

江左承南渡潯陽控上流平時稱用武今日更防秋六

代規模古三江險阨周高憑隆屏翰下瞰握襟喉呼吸  
聞吳楚封疆矗斗牛循良渡虎跡神武射蛟遊勝事餘  
蓮社風光足庾樓倚天開峻極倒影湛飛浮鼎敗香山  
往官輕靖節休義門十世美將業二王優頃歲承平久  
斯民習俗修究心依學校服力事田疇獄淨苔荒砌山  
深麥掛丘共知忠義篤肯陷矯誣羞不料風塵起能令  
日月幽雲屯滿赤縣天意卒鴻溝郡邑生荆棘江湖識  
冕旒竟捐形勢地聚作虎狼陬

紹興初李  
成盜此

昔計何勝辱

羣生亦暫偷竒功思赫赫內治頗悠悠法令中間弊流

移不可留

經界法行始有安居之弊產去稅存德安一縣歲逃移千七百戶

未經真撫

恤還已困虔劉對壘緣淮甸長蛇致

闕

逆亮入寇其臣有欲首取

江州者

雷聲忽天狗旗尾又蚩尤隔岸幾航葦孤城亦綴

旂兵戈閒耒耜戰艦奪松楸

隅官之擾民不得耕戰船之材多伐民墓

天下

雖同擾江西又不侔宿師惟此地

江西獨此屯戍

履畝倍他州

曹翰洗江州獨用偽唐全稅

諸將紛紛是攸司日日摺文符競旁午

膏血罄誅求戰鬪連年永瘡痍幾日瘳孽牙中作梗

盜賊



日甚氣習遂成媮情動穿墉鼠風行借父糧

風俗舊  
淳今狡秉彝

均物則失德自乾餱近世凡臨鎮何人解撫柔帝為輟  
近侍人喜得賢侯父子文章偉君臣契分投王言資潤  
色國是仗謀猷詩似丘傳鯉書如固續彪鳳毛宜鶩鶩  
驥種自驊騮增重依蓮幕尤煩借箸籌折衝皆婉畫賜  
履又分憂奕奕長江上源源數路頭若非煩柱石何以  
鎮貔貅南土驚新事西清擁碧油春風迴野色江月靜  
簾鉤地借長城望塵清奕世讐有生皆固結無士不冥

搜公下車之始  
即問姓名

立國須才用聞公銳意收龍門如可上

敢請與荀儔

和陶詩六首

并序

古詩不和唐始有之亦未有追和古人者雪堂先生  
始出新意盡賡淵明詩彼誠有感云爾隆興二年余  
浮家東吳僦居日糴大水入室無所容其軀妻孥嗷  
嗷至絕烟火羈旅憔悴之態如雪堂之在嶺外而淵  
明之棄彭澤也由是宦情日薄而歸意日濃矣暇日

淵明詩不能盡和也事類意感輒繼和焉懼觀者不  
我赦也故序其意云

和歸田園

皇天亦愛我生我匡廬山勉承父母志功名期少年既  
無取日手遠去窮真淵又無謀生才廣有負郭田富貴  
兩不諧胡為乎世間眷言數原居宛在瀑布前野曠易  
得月谷虛常帶烟行歌紫芝曲醉上香爐巔念此百年  
身有此足以閒若乃不決去使彼山悽然

和飲酒

竹門固無鑠俗客自不開而欲挾彼態使我變所懷鄉  
原善同俗於德則有乖乃知違世人所貴在幽栖客有  
愛我甚命駕來衝泥憐我與俗異欲我與世諧甚知客  
言是甚知余心迷淵明飲酒詩賡以遺客回

和乞食

淮陰漂母事不謂身見之長歌淵明詩益信非虛辭嗟  
余客長安十載無休期一飽不自足況敢謀酒卮曳裾

富兒門丐食酬一詩達于公卿間喧喧謂余非雖知責  
我至終亦無所貽

和貧士

吾聞戴安道不對王侯琴當時豈不能低眉求賞音一  
曲朝得聞千金夕得尋捨之不肯顧輕重得所斟小人  
一時快君子百世欽貧士繫此辨士乎當正心

和雜詩

遑遑行路難汲汲艱食迫井田邈不再兼并蔽阡陌永

懷先父祖遺我以清白出門無所容疑此天地窄秋風  
瘦遙山涼意愜行客江南記舊遊不歷岐王宅

又和

淵明棄彭澤歸歟在柴桑我里亦其側俯視世秕糠顧  
瞻無所憂所憂在絕糧敢辭躬耕勞耜山之陽惜哉  
命之窮仍歲螟蠱傷去為游手民足跡已四方拂衣却  
歸去馬用祖離觴

同張安國遊萬杉寺一首

寺有昭陵御書

昭陵龍去奎文在萬歲靈杉守百神四十二年真雨露  
山川草木至今春

重九再到張已隔世書詩牌後一首

碧紗籠底墨纔乾白玉樓中骨已寒淚盡當年聯騎客  
菊花時節獨來看

昌國偶成

諸邑皆山可夜馳海中昌國力難施風潮阻渡連天地  
期會申嚴限日時願以老身從此免忍將人命逼諸危

交門山下須臾死肉食諸公知不知

留別昌國五首

妄意絃歌學子游迄無三異比中年丁寧今夜東風雨  
添起潮頭急去休

全家雖脫海波危舊治無人詠十奇孤奉明恩顏似甲  
却嗔兒女笑嘻嘻

三山月淡白銀闕九老春閒紫石宮

出十洲記此去能爭幾

多地恨無仙骨到其中



當時底事乞身歸萬物何曾與我違最是臨行更腸斷  
海鷗猶自掠船飛

扶桑曾見日騰空老去歸田不復東一覺短簷他日夢  
起來惆悵曉窗紅

昌國秩滿次陳糾祖行韻

昔之督郵遂彭澤今之督郵眷昌國不令自賦歸去來  
更以新詩祖行色開緘墨濕雨濛濛細讀字字含清風  
塵埃三載足昏塞一聽妙語還醒鬆持歸柴桑有茅舍

揭之其間作佳話非惟可託陶淵明亦愧當年督郵者

題四羊圖

三百維羣世不見迺以四羊為一圖人言此圖出韋偃  
不知韋偃有意無巖巖參天一古木下有輕篋滿郊綠  
雲髯隱約黑暈中沙肋微茫筆端足昔聞韋侯畫馬工  
杜陵長歌歌古松孰知畫羊更如此世間絕藝誰能窮  
蘄春太守好事者珍藏有此希世畫嗟予得見雙眼明  
此一轉語久難下三羊游戲芳草茵一羊輒登枯樹根

安得添我作牧人為公鞭此一敗羣

丙午寒食題淨土寺

方見繁紅秀

闕

隨流水泛前村

闕

於醺醖真無分

雨共鞦韆似有冤投老故應諸事懶問春能得幾分存  
不須更作匆匆散更把松梅子細論

再遊用前韻

十年不到此祇園又為支郎暫出村犬認行蹤增踴躍  
燕驚離恨苦埋冤鬢邊但覺新絲長壁上惟餘舊墨存

但問桑麻添幾許世間萬事不須論

上巳日鴈乂阻風呈宋彥起

往來定是一年一時節長逢三月三

闕

未佳宜且住

樹猶如此我何堪花飛與客渾無與酒好招人只自慙  
安得惠風和暢景與君方櫂看淮南

長風沙次宋丈韻

已將身世等河沙又泛春江看浪花錦纜牙檣君送酒  
蓑衣蒻笠我浮家淹留日覺青春暮飄泊風兼細雨斜

安得崑崙能探水試教來奏小琵琶

都下病起呈王樞密

不解彫蟲賦逐貧又無饒舌論錢神  
遭逢此鬼今番瘡零落吾生有限身  
舊學試溫渾易忘新書欲謹自難真  
時危壯士乃如此為報堂堂有位人

瓜時有感

籬邊方對菊花黃又報文移出草堂  
三宿敢云桑下戀四翁終願橘中藏  
泉縈去路常低咽酒向離亭不肯香

聖代多才焉用我明年重上乞身章

謝趙宰拜襄敏墓并留題二首 并序

惟先襄敏公受知烈聖神文之時學古入官獻太平  
時制書名在第一裕陵伐叛受命西征闢國萬里全  
師獨克百年夢奠丘墓幽遠無有知者知縣趙公多  
識前言往行獨深知之奉詔出宰實部九原乃因勞  
農特枉三步盡尊賢之意存追古之心風示諸侯事  
關政教非特先烈感遇而已某不肖既獲躬執耒耜

被撫田間又獲奉承薦酌感泣墓下敬賦二詩跪謝  
下執

班春故事亦年年公獨推誠遠布宣麗日借黃催麥壠  
惠風吹綠散秧田衆魚入夢蓑衣下異雉飛馴桑蔭前  
好詠十奇歸樂府聖朝方採下民篇

河湟人去鎖春蕪三步遙勤一束芻盛事揆揮千古烈  
英詞噓動百年枯故家零落今朝遇此段孤高近世無  
地下結成無限草待公肅甲破幽都

送沈侍郎

重入修門已有期，趣裝聊此著征衣。  
帝思宣室名儒對，人喜玄都舊客歸。  
高節不難全晚歲，亨途未必盡危機。  
願公且為蒼生起，莫向苔溪戀翠微。

題嚴陵釣臺

并序

題釣臺多矣，大槩高之爾，未有明其意者也。光武既定天下，深懲王氏之禍，原於張禹、孔光之流，故昔之所謂坐論者，一切吏之時，或叱咤侯霸等，俛首而已。



先生道高千古豈能堪此雖以禮聘不以禮答項枕  
卧語又從而躋踐之使知己之不足驕士卒不少留  
古語云使騏驎可係而羈兮豈云異夫犬羊此則先  
生之志也其首陽之流乎為賦小詩以發千載一笑  
西都庸庸生禍胎東都切切繩公台平生故人苦畏辱  
坐定白雲那肯來沈幾深畧滿帝腹且憇先生一雙足  
使知天上麒麟兒不似犬羊甘秦畜渭濱老叟不自持  
為人人以鷹名之豈識桐江一竿竹依舊秋風魚正肥

古來賢者亦避世往往適逢天地閉得如建武亦不惡  
又值首陽難降志山木陰陰江面寒此天別在壺中寬  
幾曾流出桃花去寶氣自駭人間觀當時不願世知己  
稱到于今却如此塞馬得失天好還千駟齊侯不窮理

出郊訪沈洞主

抖擻塵埃暫出郊一藤先訪羽人巢風翻翠浪催禾穗  
秋放殷紅著樹梢萬里家山懷五老千年活計却三茅  
明朝便好乘風去不學浮屠更打包

瀑布二首

吟詠瀑水衆矣大抵比況爾未有得於所見鑒空下  
語為興詩者大白獨曰海風吹不斷江月照還空氣  
象雄傑古今絕唱而疑是銀河之句亦或比焉戲述  
二篇興比各一

造物小兒不任事一天元氣從淋漓雲中雨降自應爾  
山上水行誰激之幽林洶洶虛籟作赫日榮榮寒光垂  
謫仙獨步得興體此外篇篇俱比詩

萬仞晴空不可攀  
天將飛瀑掛其間  
一雙玉塔倚絕壁  
兩道白雲騰半山  
覆器以歌嗟魯廟  
設瓊而建笑秦關  
春風一卷出山去  
萬里青秧抱甕閒

題高遠亭

小攜樽酒作清遊  
行到方壺最上頭  
山在斷霞明處碧  
水從白鳥去邊流  
苦無妙句窺天巧  
賴有名亭慰客愁  
從此江南添勝景  
未應獨數庾公樓

泛舟

雪川荷葉浦彭蠡石榴頭此地皆奇絕平生所爛遊從  
來貪水國老去只漁舟更有乘桴便何人從我浮

龜父國賓二周丈同遊谷簾二首

偶然得意挹珍流二妙欣然共勝遊怪得坐間無俗語  
谷簾泉水建茶甌

一飲清冷體便輕絕知真液是長生歸來世事都忘盡  
惟記白雲堆裏行

蓬屋

長簷十尺庇堂東，疎漏從來盡是蓬。  
日影碎如秋葉下，雨聲灑似夜船中。  
竹因蠹盡多垂地，箬到枯時半掩空。  
此處想非人所競，衆雄應是不來攻。

出豐城

搖搖旌旆出洪都，彌望田疇總廢墟。  
羸馬不前身突兀，耕夫相視笑軒渠。  
倚松茅屋斜開徑，近水人家半賣魚。  
蒲葉向冬猶未割，臨風遙憶路溫舒。

龍塘久別乘月再到奉呈同社

在姑蘇

龍塘疇昔擅雲烟  
破月重來倍爽然  
浮玉北堂三萬頃  
扁舟西子二千年  
青山識面爭迎櫂  
白鷺知心不避船  
華髮脩脩更何往  
一茅終在此橋邊

再用前韻

已無功業上淩烟  
且泛扁舟逐計然  
自喜茲遊勝平日  
不知今夕是何年  
橫空蝦蟇聊歌枕  
滿袖嬋娟永共船  
同社賢豪多載酒  
坐添清興浩無邊

姑蘇泛月

夜來誰共泛靈槎飛上牽牛織女家但覺滿身私雨露  
絕無一點世塵沙秋將寒玉清風陣月借鎔銀潑浪花  
投曉歸來互相告等閒休向俗人誇

都昌沿檄黟歛遇春

忽忽年華換悠悠客路長春聲先水響山氣欲花香何  
補公家事空隨吏役忙白雲知此意一片直都昌

湖南道中二首

已分餘生老一丘尚因微祿少遲留夢魂不待山資足



先入江南問釣舟

萬壑千岩我一家別來空自鎖烟霞閒雲不放行人望  
故向東南角上遮

題淡巖

浯溪已借元碑顯愚谷還因柳序稱獨有淡巖人未識  
故煩山谷到零陵

陳彌高惠詩次韻言謝

南來日日訪人才始得清詩副所懷我計已成桴入海

君行初似橘踰淮十年旅夢思乘興千里征塵忽及堦  
見說又為勲業去獨能無意侶洪崖

勸農題吉祥寺

傍石尋幽徑窮原得梵城潮聲四面合山色一團清  
農合巡門勸僧煩倒屣迎明年吾更健來伴此中耕

劉致政家東岡池蓮甚盛昔嘗飲焉賦此叙別二

首

一枝曾吸碧筩杯萬丈潮頭忽見催斜倚闌干獨惆悵

明年應是不能來

世路東西自此分  
酒樽何日再論文  
虎蹲山下一回首  
望斷東岡是海雲

宋詩鈔卷九十三

欽定四庫全書

宋詩鈔卷九十四

內閣中書舍人吳之振編

東臯詩鈔

戴敏字敏才號東臯子復古之父乾道間人平生不肯作舉子業獨以詩自適終窮而不悔且死復古方襁褓語親友曰吾病革矣而子幼詩遂無傳乎太息而卒語不及他其篤好如此遺稿不存復古後搜訪

得此十篇鍛鍊精而情致逸此石屏詩源猶少陵之  
審言也

小園

小園無事日徘徊頻報家人送酒來惜樹不磨修月斧  
愛花須築避風臺引些渠水添池滿移箇柴門傍竹開  
多謝有情雙白鷺暫時飛去又飛回

屏上晚眺

不能騎馬趁朝班自跨黃牛扣竹關無德可稱徒富貴

有錢難買是清閒  
人行躑躅紅邊路  
日落秭歸啼處山  
遙望蓬萊在何許  
扶桑東畔白雲間

約黃董二親與桂堂諸姪避暑

世間無處避炎蒸  
欲叫西風叫不應  
恨乏白檀除熱惱  
心思赤脚踏層冰  
醉游河朔誰同往  
表借明光愧不能  
聞有山林最深處  
清涼境界著高僧

樓上

終朝役役晚來閒  
識破浮生一夢間  
挈榼去沽深巷酒

倚樓貪看夕陽山月臨江館人橫笛風摺蘆花雁度關  
堪羨漁翁無檢束扁舟占斷白雲灣

西溪陳居士家

來訪西巖老家居水竹村紫麟遊鏡曲黃犢卧雲根自  
昔好賓客相傳到子孫不行亭下路護筍別開門

後浦園廬

卜築成佳致幽棲樂聖時何如謝公墅畧似習家池地  
煖梅開早天寒酒熟遲催租人去後續得夜來詩



鄭公家

門牆多古意耕釣作生涯  
菽米散魚子蓮根拔虎牙  
弄孫時擲果留客旋煎茶  
頗動詩人興滿園蕎麥花

海上

萬頃鯨波朝日赤滄洲四望無窮極  
海上何處是蓬萊  
遍問漁翁都不識

觀梅

三杯暖寒海一榻竹亭前  
為愛梅花月終宵不肯眠

趙十朋夫人挽章

縫掖先生遊汗漫夫人高節獨青青臨行抖擻空書笥  
分付諸郎各一經

此詩有五絕吟藁零落十朋先生黃巖前輩行誼甚  
高嘗有詩云數枚豚犬粗知書二頃良田樂有餘杜  
酒三盃碁一局客來渾不問親疎梅溪先生尊敬之  
有杜三盃碁一局王十朋如趙十朋之句

宋詩鈔卷九十四